

Malachi / מלאכי - According to Dead Sea Scrolls Manuscripts Combined

Chapter 1 not extant among Dead Sea Scrolls

Chapter 2

Verses 1 - 9 not extant among Dead Sea Scrolls

10 הלוֹא אב אחד לכלנו הלוֹא אל אחד בראנו מדוע נבגד איש באחיהו לחלל ברית אבתינו:

11 בגדה יהודה ותועבה נעשתה בישראל ובירושלם כי חלל יהודה קדש יהוה אשר אהב ובעל בית אל נכר:

12 יכרת יהוה לאיש אשר יעשנה עד וענה מאהלי יעקוב ומגיש מנחה ליהוה צבאות:

13 וזאת שנית תעשו כסות דמעה את מזבח יהוה ובכי ואנקה מאון עוד פנות אל המנחה ולקחת רצון מידכם:

14 ואמרתם על מה על כי יהוה העיד בינך ובין אשת נעוריך והיא חברתך ואשת בריתך:

15 ולא אחד עשה ושאר רוח לו ומה האחד מבקש זרע אלהים ונשמרתם ברוחכם ובאשת נעוריך אל יבגד:

16 כי אם שנתה שלח אמר יהוה אל ישראל יכסו חמס על לבושי אמר יהוה צבאות ונשמרתם ברוחכם ולא

תבגדו:

17 והגעתם אלהים בדבריכם ואמרתם במה הגוענו באמרכם כל עשי רע טוב בעיני יהוה ובהם הוא חפץ או

איה אלהי המשפט:

Chapter 3

1 לכן הנני שולח מלאכי ופנה דרך לפני ופתאם יבאו אל היכלו חאדון אשר אתם מבקשים ומלאך הברית

אשר אתם חפצים הנו בא אמר יהוה צבאות:

- 2 ומי מכלכל אותם באו ומי העומד בהראותו כי הוא כאש מצרף וכברית מכבסים:
- 3 וישב מצרף ומטהר כסף וטהר את בני לוי וזקק אותם כזהב וככסף והיו ליהוה מגישי מנחה בצדקה:
- 4 וערבה ליהוה מנחת יהודה וירושלם כימי עולם וכשנים קדמניות:
- 5 וקרבתי אליכם למשפט והייתי עד ממהר במכשפים ובמנאפים ובנשבעים לשקר ובעשקי שכר שכיר אלמנה ויתום ומטי גר ולא יראוני אמר יהוה צבאות:
- 6 כי אני יהוה לא שניתי ואתם בני יעקוב לא כליתם:
- 7 כי למימי אבתיכם סרתם מחקי ולא שמרתם שובו אלי ואשובה אליכם אמר יהוה אלהים ואמרת במה נשוב:
- 8 היקבע אדם אלהים כי אתם קבעים אתי ואמרתם במה קבענוך המעשר והתרומה:
- 9 ומראים אתם ראים ואתי אתם קבעים הגוי כלו:
- 10 הביאו את כל מעשר אל בית האוצר ויהי טרף בבתי ובחנוני נא בזות אמר יהוה צבאות אם לא אפתח לכם את ארבות השמים והריקתי לכם את הברכה עד בלי די:
- 11 וגערתי לכם באכל ולא ישחת לכם את פרי האדמה ולא תשכל לכם הגפן בשדה אמר יהוה צבאות:
- 12 ואשרו אתכם כל הגוים כי תהיו אתם ארץ חפץ אמר יהוה צבאות:
- 13 חזקו עלי דבריכם אמר יהוה ואמרתם מה נדברנו עליך:
- 14 אמרתם שוא עבד אלהים ומה בצע כי שמרנו משמרתו וכי הלכנו קדרנית מפני יהוה צבאות:
- 15 ועתה אנחנו מאשרים זדים גם נבנו עשי רשעה וגם בחנו אלהים וימלטו:
- 16 אז נדברו יראי יהוה איש על רעהו ויקשב יהוה וישמע ויכתב ספר זכרון לפניו ליראי יהוה ולחשבי שמו:

17 ויהיו לי אמר יהוה צבאות ליום אשר אני עשה סגלה וחמלתי עליהם כאשר יחמל איש על בנו העובד אתו:

18 ושבתם וראיתם בין צדיק לרשע בין עבד אלהים לאשר לא עבדו:

19 כי הנה היום בא בער כתנור והיו כל זדים וכל עשה רשעה קש ולהט אתם היום הבא אמר יהוה צבאות אשר לא יעזב להם שרש וענף:

20 וזרחה לכם יראי שמי שמש צדקה ומרפא בכנפיה ויצאתם ופשתם כעגל מרבק:

21 ועוצותם רשעים כי יהיו אפר תחת רגליכם ביום אשר אני עשה אמר יהוה צבאות:

22 זכרו תורת משה עבדי אשר צויתי אותו בחורב על כל ישראל חקים ומשפטים:

23 הנה אנכי שלח לכם את אליהו הנביא לפני בוא יום יהוה הגדול והנורא:

24 והשיב לב אבות על בנים ולב בנים על אבותם פן אבוא והכיתי את הארץ חרם: